

見素林公文集



見素集卷之十五

後學黃佐校正
孫男及祖重梓

墓誌銘

承德郎岳州府通判東臯陳君墓誌銘

君諱愈字師韓姓陳先姓鄭南湖三先生露之後至正間
君高祖四秀由陽城來贅東臯遂從陳姓曾祖孔順祖梓
俱有隱德父希玉母許氏君生景泰辛未二月二十五日
十月喪其父時許方二十有三歲孤弱一身飢寒在其體
亦奚恃以自固耶以有君望耳謂容弗嗣而去許以死弘

治癸亥五月初一日也嗚呼痛哉君羣兒時軒特雋求時
若有所思許心私噐之旣就學季父邑博君鑪諸兄挈壺
君師烈又噐之比長從太守朱愷授經又噐之遊刃學割
盡得其肯綮中成化癸卯鄉薦志養自謀不樂乙科旣竟
不得進士居益貧時許年亦七十則嘆曰宰物畛域我也
就吏部試通判岳州迎許官所入色養出則服官政湖南
民困賦重催科吏復入常例錢椎剥肌髓君易前絃民蘇
賦足尹大老聚徒鈔掠洞庭間商民患苦君用裾縫法擒
之和糴靖州邊餉督造內供歲幣皆以能被殊委撫巡有
嚴正勤密之書疏尋登而君瘡疾亟泣謂許曰吾母守兒

志竟莫酬又無丈夫子以後吾母老無聊兒何以死又謂
妻朱曰善事母以堂弟某之子陽春爲後言訖氣絕郡之
守貳與屬之士民無不盡傷者君六女長適王恭甫次適
朱子御次適林道明次許林世槐其二側出俱幼喪旣歸
卜以甲子十二月戊寅葬安樂里瑠山某向君內兄朱君
謙狀事行託銘掩幽之石嗚呼德門也貞婦也賢孤子也
考常論世詘信相乘之大機宜昌以壽也卽未然亦遽宜
絕以死耶事有不可曉者是類也王屋謹嚴神不福謙丙
吉國絕天道之不可信古今事有終未定者獨君然哉銘
曰易系貞亨書紀善積順修乖應值萬于一頽緋肩峙有

身素集卷之十五
葉有年不循彼武于茲迤邐地老天荒蘭摧玉碎泉臺掩
幽岡雨晝晦滔滔逝川迄迄洪源厥初允念世隕若存

龍樓陳立雪甫國泰合葬墓誌銘

龍樓涵江望聚陳望姓居則龍樓也鰲山陳墓所國泰志
自近也立雪藏右配俞氏藏左子樂賓祔左嬪余氏又祔
左合之四窀也立雪以學古自命立懦律貪爲已風槩甫
弱冠卽開義塾賢問殷殷固已得張弛之大端人用老成
之庸謂其僅天以死耶俞時二十五樂賓時四歲二女呱
呱身後事大若不可憑庸知俞能力自矢完有節能立有
孤如今哉庸知樂賓能成父志裕于躬以發于其子如今

哉節則難身則可保也教則無難子則賢不肖則不可保
也俞豫知陳之澤未斬立雪之賢必終祐斯自據也立雪
有佳弟尚明君嚴鎮有古法樂賓內承賢母外承賢介父
又外承賢師友之麗澤薰蒸志尚孤潔遊郡學有時名一
日見母疲家政痛不自安謝歸養母與余共子婦道儀厥
宗姻責厥于世傑以光復陳氏酬先志焉陳出少府本之
後嘉定戊戌致政日新自莆城徙居龍樓五傳而至孟方
又至以進又至貴華又至立雪又至樂賓立雪諱夔字尚
樂生永樂壬辰二月二十七日卒正統丙辰七月十三日
年二十四俞生永樂辛卯十月二十日卒成化乙巳十二

月十五日年七十五樂賓諱竣字恒雍生宣德壬子九月十九日卒弘治乙卯三月二十九日年六十四余生宣德癸丑五月初三日卒成化甲午十二月十三日年四十二癸卯葬立雪庚申葬樂賓墓余今甲子葬俞世傑由鄉進士爲無錫教諭應聘爲考官尋應薦爲池州教授既過家泣且言曰世傑以十二月壬申襄我祖妣葬事惟葬俱未志滄桑變滅有餘感焉謹以爲累予聞陳襲有魚蕩之利以高貲好禮聞鄉閭尚明君子及識魚魚雅雅居然處士風致以故士夫道涵江必過龍樓過龍樓必陳氏陳氏衣纓雖再續郡博而門巷車馬上世已然立雪三孫長郡博次世顯亦爲揭陽典史次世純曾孫銘曰善可憑有不可憑而可終憑于陳是徵

黃巷黃君儀韶改葬墓誌銘

莆重士族在涵江宜莫如黃黃宜莫如黃巷桂州刺史峯始遷祖也新府則樞密使鏞賜第鏞弟太子正字三傳而至朝奉生元良元良生甲仕甲仕生孟章娶陳氏正統己巳生君二月二十七日秀特神朗有孝性其治舉子業也有聲輩人遽則天死成化庚辰十月二十九也年二十二去上殤一等耳新婦李足未盡黃闔闔其奪其守其未可知也其所恃者孤筮孺脆在襁抱其育其否其未可知

也李之志自知耳人則誰信之雖君之父母與李之父母亦未敢謂必然居左之墓同穴之先備李其不忍去君以示所不二如文叔令女無疑也壤寧知利不利哉黃安合璧寧知業改卜如今哉予重悲李之責之難而君身後之幸也宗祊弗嗣李未可告也文獻中謝家以落未可告也弗章顯以光大門戶可告而未可終告也今則裕爲之丈夫生而澌盡者例有之寒弱一婦人而聞于鄉標揭于郡上姓名天子而聽之褒嘉垂及焉君得以附名其間以父則未爲終不幸也君有父母李孝養之歿禮殯葬之有弟妹成立之族之子未晬而父母死李乳鞠之仁視若

出已易名文鸞長而誨諭之納之室而復其故產于常苦若其履險若甚夷重若弗耐而若誠安之蓋棺事定今而後可以藉手有詞無愧容于君矣人則誰弗信之則可謂難矣予又悲孤之責之難也罔極之報其百常情矣乎君與李重無憾矣君諱鳳字儀韶李諱肅姜望江墩上克忱之女莆田令丹之後其生丙寅二月三日卒巳未正月九日孤文鸞鄉進士稱家兒者娶姚繼娶方女適林環遺腹出也孫應魁孫女三人俱幼癸亥之歲臘月壬寅文鸞遷君而以李合葬則以諸兄教諭文璋之狀請銘銘曰惟黃世先文輿接軫派于裔姓或韜以隱君如鄧林勁直臚理

亦如出日亟以風雨境樂而悲何惡何慕惟父母躬寧母
我顧我有孤孺惟脈之遺有如弗邱執言之思妾心匪石
亦則深井弗轉以搖吊時隻影寒餓事小中矢靡忒兒利
用賓孔懷伊感黃安仙原名實該副秘幽會靈永錫祚嗣
贈承德郎太平府通判談松軒甫墓誌銘

南海有隱流談松軒甫完醇居晦縱傲之芳洲碧樹之間
引身淵龍送日冥鴻脫泥蟠而橫雲表無患其不能至也
而樂不在是嘗恠夫士者離親戚遠鄉井而去之京師一
顧價增而買用弗售亦屢屢矣食官蒞局大吏者寸寸而
約繩之亦勞以束矣吾有吾樂焉學不求博求其要道不

求其深而求其自合經濟一身而施之一家之政父母順
焉兄弟妻子宜焉鄉之人悅而信焉斯而已矣甫盡子弟
道對妻子無雜言妻梁氏女間訓大家亦善順適勤儉以
立有家嘗拾遺金環付其主甫曰良吾婦子經舉鄉薦爲
通判爲同知清約畏謹奉以終身得連被旌命甫曰良吾
子弘治癸丑九月六日甫卒數月追贈承德郎太平府通
判經初官也諱誦字以道梁諱文德封太安人旣專家政
一循甫舊規經念春秋高不忍舍去慰遣以行故經在甫
郡幾十年不携妻子甲子十月十四日梁亦卒壽八十八
甫損其十焉談故江右萬安儒家寶祐間應奎牧循州遂

家南海平洲蓋其地也生時雍時雍生文貴文貴生稅長稅長生康護娶麥繼娶梁生甫子卽經又綸又綱又紀孫佐儲俸仁傅侃信儀任曾孫道泰道亨侯旣奔梁喪以乙丑某月某日奉甫合葬大羅岡祖塋之左以狀請銘予聞之良玉不斲醴泉不和其貞色霧味有天成者樗雖散不逮楸楠斧斤有間矣井之澤不逮江淮河濟覆溺之患又有間矣故莊周上無爲以敝敝人事爲破樸拙如甫者例可書重之侯予厚銘能已耶銘曰蘭膏自焚刃芒先缺逸足健羽折翰駭轍達人高致沉落光耀弗繫世憂已辱奚召棠邑貞晦南陽德公真風罔嗣甫或無同平洲大羅松雲自樂生斯死斯仙兆斯卜有躔太丘奕葉昭美哀石勒潛言告孫子

中奉大夫致廣東左布政使事林公訥軒墓誌銘

弘治甲子左布政使林公訥軒卒明年葬資壽山其孤禮致憲副黃公熒之書請銘嗚呼渾樸解完士之趨日以下得見尚古者斯可矣公與吾郡黃公汝器方公宜約同時三方伯俊所畏也前歲銘汝器去歲銘宜約今又銘公老成淪落有餘感焉公初諱大同後從里辟爲同進卿字也漳之文山士家曾祖瑩中祖仲謨先生事經賢父也鄭安人母也秀臞高骨氣定而神閒不爲習俗嗜好道用晦昌

事以誠久基遠功而畧近効故恒信于所知而詘所不能知由進士爲工部主事改戶部轉員外郎郎中兩列最書一膺 勅遣旣又有江西布政司右叅議之拜信所知如是焉所不能知有廣西之調旣又有浙江右叅政廣東右布政使與左之擢藩服大致然也不舉于彼舉于此而優于職所逾重詘公者無重以信公耶公始遊從祖邑博澹齋繼游從父邑博默庵于湖專志理學久而過之不欲外自異文公禮呂氏鄉約奉以終身故所至諭行無間二書與北溪文集字義蒙訓竝梓傳而廣焉靜鎮躁正辟邪嚴佛事火墓之禁毀三教歸一殿修來學雄學遷文山觀

瀾書院公之任也新官政澄吏奸汰倉弊按飛洒之豪戶加額之運軍脫伍之戎籍與保定之平糴價停屯徵蠲夏稅減柴夫馬匹厨料軍需增月糧罷河役存活二十五萬口而餘公發用之通也監收監督鎮守皆巨璫公不爲屈兩廣臺臣藩憲有跪禮公不行卿貳左轄之階公望復大起不少須以致其政介也拾遺金還之故人餽涉非道卻之俸入親與士夫之賢生有給死有葬陳憲副冷庵之貧張吉士紹齡之死尤加厚焉默堂之坐視差父弟某姪祺之教愛無異視子大宗之祠堂先正林梅雪之祠堂陳方伯選之墓表又手立焉惠與義也暮年委情林壑輕健若

童子身家重若無官所居樹生異花臭如蘭色如蓮彌月則落落則公病以死五月初四日也嗚呼物之鍾異蓮獨稱君子蘭清修所自況公無是兆邪鬼神若信之矣生甲寅十二月二十七日配安人徐氏有賢行子卽禮嚴出娶葉女三黃琳蔡烈王翰其婿禮琳烈皆郡庠生孫獻其葬臈月甲子銘曰燕紀刻棘齊頌炙輶腐或檐拘達迺蟹躁粵有握瑜天日自矢蘭化弗芬我擷其是嗟嗟訥軒志潔行廉洞視底裡虛明坦謙官以恬起亦以施貧大醇縷脉流風此真悠悠北南徑途川曲盍起典刑永觀漓俗

刑部主事黃西溪配安人吳氏墓誌銘

黃西溪主事刑部時也廉白有聲入其門練車軋軋徹廳屏主人諭止止復作它無是也約客皆出事日酒出自製肴核釘餽叅新故物而有僕馬之需視時之登歛爲計一年予以知內子之賢其積羸也以儉相焉連數日西溪哭一子一女女安人出也安人哭子而哀對慰者言是重難忍三十年佇結慰意是兒方潑潑跳走兩睫間新歲擬遣就學門戶委付焉曾是殤死人壽命不可期呱呱黃口又將敢恃謂子瀛也自是百志摩撫熟視其冷煖飢飽之節易垢易濕備出手業而僅乳于所生今林氏也西溪歸省安人事舅主事翁廷言姑林安人婦職備焉西溪還京安

人請獨留侍瀛時方却乳罔知身所由出也樂與偕留林
竟莫可挽致西溪死保瀛益專以義自割不曲庇外家方
林二女不溺已生之愛或則有隱界之疑旣之家不落屋
以尋剗焉日惟瀛稚弱疾病惴惴恐不及其成冠始喜林
氏婦入門又喜孫應福生又喜一日闖門半面拜予女媪
抱弱孫爰立若將有所諭已而知欲昏吾孫女抑有托也
嗚呼世有寧老死不畜妾坐絕人後倒囊女子無分寸遺
庶子落莫不復憐視而身亦與及焉視安人之風母厚愧
邪文峯處士德温之女西溪旣迎相主事翁喜曰吳氏女
多貴鐸偶新婦其福之符旣果得婦道母道甚父子夫婦

恩數人及焉淵靜無翔語理焚應猝如材丈夫十許年連
治西溪與舅與姑三大喪葬均致厚勤而處極整暇以予
殯西溪故兩家內交若姊姒然孰謂女婦人能記人往德
如此哉其生正統丁巳四月甲子弘治癸亥十一月甲子
年六十七而終又明年十二月戊寅從其夫葬黃上世由
七步徙龍坡最後桐巷主事翁啓卜焉西溪字文器諱曰
鐸婦則宜城縣令曰典之女婿方曰繼仁林曰曰欽孫女
尚幼銘曰黃一再世甲科四膺文輿仕幟電睽風稜藩臬
重僚曹郎內史門高立難矧乃女婦牝吻晨亂螽斯失聲
義生弗忤乃復斯鳴有淑若人閨儀與與戚疏賤良處得

地所植孤襄事母婦道常以書以銘教熄之傷景祥之山
黃莫叢立冷風白楊過者心盡

先妣黃氏壙誌

封安人黃姓吾母也在東里稱賢女吾聯桂林稱賢婦又
稱賢母年七十六弘治癸亥七月二十八日卒十二月葬
雲庄聖塘凹處二十一日也生宣德戊申十月十九日男
俊侃傳佐僖孫達遇適遴適遠近暹達週吾父主事翁命
瘞誌石復納是磚于壙嗚呼吾母古丈夫之賢而女者侯
唐何加諸其百世祀其是山相始終無疑也俊泣誌

明太倉處士周君必章配陸孺人墓誌銘

司馬涇崑之東鄉故地今太倉州屬焉周與陸竝涇東西
而居孺人陸君旺季女處士周君必章之配今知莆縣事
侯母也周盛時族分而四號四周村侯高祖安二曾祖子
祥農業自支至祖海而家益落處士既早失怙恃又爲尊
執所漁糶才無倚婚媾固已後期旺無丈夫子謹圖沒身
之托熟伺之知必樹立遂嬪孺人于周屬資產爲地時孺
人年十四老成自將承接進止有令儀獨手夔夔每坐必
有業隣壁不聞詬怒之聲惟紡車軋軋連夜分爲常二門
竝恃自振旺終事處士誠力焉處士沒孺人獨手內政男
室女家教子程法如處士時弘治辛酉侯就試孺人窮百

晝夜得十縑爲資是秋舉子捷至乙丑進士捷又至落門
崛起孺人安習無輕容年高而子貴仕執勞猶故一日鍼
綴裾偶刺入膝瘡潰爲風所襲竟弗起 正德丁卯六月
十二日也生宣德乙卯八月二十五日子溥娶張廣卽侯
娶張繼娶夏博娶朱孫希淳希濂希范希淵漆書希淳州
學生女孫女俱二侯方八月于莆近古之政予合焉孺人
之憂去焚浮屠彌月滕口者因神其妄孺人生未嘗信佛
固了了也世嘗疑昌黎潮陽之行爲疏佛骨不知前是之
三左官誰譴後是之三右官又修何福也六一之本論致
堂之崇正辯闢之亦勇矣不聞何譴則果誰欺歟孺人適
值之也吾儒事論當不當不當論禍福況萬萬無是理耶
侯歸柩金溪以某月某申子從處士以葬以監察御史陳
君茂烈之狀請銘銘曰老樹悴枝有落舊門天至柔貞共
處艱屯中違所天載什而起氣奪雄夫誰則婦女母婦之
淑維梁維陶計厥易難陸百斯勞滯途僅亨榆境罔待手
樹手收窀穸斯快

見素集卷之十五

見素集卷之十六

後學黃佐校正
孫男及祖重梓

墓誌銘

明將仕郎南京武學教授黃抑齋墓誌銘

抑齋黃君骨清神竒肌理玉色瞳漆若祖山藩叅議常公
慰意是孫抱而撫之命名開顏屬其父麟母吳氏與所生
母曹氏謹視之公年八十六垂絕盼盼尤在是孫九齡君
稱孤又數歲頽然長家塾席不一煖即入臥内否亦二母
呼而入之矣日約以時而計僅二在外勸之勤唯唯叩之

書善講解所攻課善辦私恠之亦私深惜之意必將漫漫
孤質美無成者不知其晦而靜爲養之深也後十餘年戊
申予過家君儒巾衣來謁已籍籍時名已西省闈已巍然
上第丙辰始授蜀之合州學正凡蜀之士夫與仕蜀而至
者皆惟君爲賢部使者以學行異等堪風憲聞且用之屬
南京武學缺教授遂以屬君凡京之士夫與仕其地者又
惟君爲賢成國公朱公大司馬韓公且疏用之弘治乙丑
五月君疽發背弗治寔生天順戊寅三月字公悅唐桂州
刺史岸公之後由涵江來居桃源世稱長厚君曾祖贈工
部員外郎震公始徙義井叅議公生桃源老義井君生義

井今烏山之下居焉温永有局量出言有章不少厲詞色
加人人訾睨善受之事二母以婉順聞念身早孤父事諸
父盡已業爲了官責而別備隙宇以棲其妻子無戚戚容
叅議公墓草三十餘春秋君始買石丐彭惠安公銘其墓
而父母銘述均致名家未解褐時也嘗落第羣輩養羞君
與陳侍御時周獨坦遊長安以觀榜出居官口不言利教
法先本後文誠動而詳處之所至材成勲貴子亦束無肆
同僚慰懌安處于其下郡大夫敬信劉憲副時讓初署合
州服有養郡乘屬筆竟傳爲信性樂竒花竹官寓時致自
娛所翕翕顧澹無取吾聞君子不自大其事自卑而人敬

尊之君其母然乎畀之壽文教可知也隆受穹付通方而成務又可知也研景斲思搜要而纂玄叅諸家而儀來雋又可知也今皆重違焉一子未孫蓄而遲且昌以大冥冥者可信也丁卯某月某日窆君于墓虛三樂丘配林氏子河清婦陳氏將合且祔焉銘曰鳳皇左擘亭峽東四神八國萃隱窿曾祖考叔世在中戊乾吉土新幽宮匯塘夾澗靈竒鍾鬼福孕祉荀八龍

明奉政大夫浙江按察司僉事柯山柯公塞軒墓誌銘

塞軒諱燉字在亨柯氏上世晉江人石晉時大理評事寶

始入于莆居武盛六世念又居金橋七世舉又居柯山舉由咸淳乙亥貢士爲管勾官是時族屬衣纓甚富入胡元無仕者 國朝景泰辛未贈禮部侍郎公竹巖崛起大魁成化丙戌公再起進士時年二十五以氣自豪羣輩錄錄無足當其意竹巖弟之鈞治簸扇無遺餘力不踰年公詩大進竒警處頗類竹巖旣爲大理評事爲寺副刑名練歷爲卿貳所賞奉 上旨按邢侍郎等獄兩廣慮囚靖江府勘事奏當無不稱 上旨遂擢河南按察僉事未上丁先評事文甫公憂起廣東又丁繼母陳孺人憂又起淞江綜煩劇劇事任有餘力提督銀冶易汙公無汙易誨盜公至

亦無盜兼攝學政所甄錄士多時名有大魁者才高任已不善爲韜晦以招尤忌飄然南歸賦詩所謂浮雲飛盡見青山者志也亭名拱北示不忘君也公雖久于官田廬僅取自足於時旣不合乃一寄於酒樹幄草茵盤礴野飲大醉則把筆賦詩睨青天盼望海雲豪吟大叫若不可爲繩束而居常訓儉整暇條理聯踈戚賙孤嫠延引後進迨老無少衰先世遺文若舉公夢語欽公採薇集皆鋟梓以行已亥修都廳辛丑續家譜弘治甲子又構祠堂落成飲懼疾作弗治臘月念三日也生正統辛酉三月六日曾祖伯益祖守衍父卽評事公母林氏繼卽陳氏配李氏繼廖氏

贈封皆孺人子代娶李繼娶林女二孫女二丁卯臘月壬申葬公海印山評事公之左百步公窆中李祔左之左廖虛左代虛右林虛右之右先事代以狀石銘記大理時予備員刑部晨夕聯馬公以詩自負一日戲予曰母欲爭我頭地吾狀元本也撫掌大笑方語合則有河南命矣公用雖不究于時而溪山雲鳥自足寄遐踪而紓情愫香山之社俊亦足侍几杖而偕之遊今不可作矣吾聞負高世之志者顛頓一遇詩工者能窮人公其坐是與所著有塞軒集若干卷錄囚奏藁若干卷太平會一卷一椿更號云銘曰物以明累亦以晦完退步樂法名爭必先飛不盡翰趨

不盡趾徑荒途迷林慚澗恥有琴有書亦有杯竿白石事
樞間雲性冶拱樹齊化孰曠孰涼孰是通塞泉扃夜長

龍坡林母謝孺人墓誌銘

龍坡之林其遷由孝義又由澄渚則邵州之後昭度之派
凡二十有四傳而至贈都憲公良弼弟從弼公死配李氏
忍貧育孤以立擇孺人婦焉是爲尚實君孺人龍井謝氏
安陸學正遜之女嫁具旣已廉薄而林兀兀僅老屋無宿
春之糧孺人身專振落之任夜紡晝織車梭無絕音以林
素儒家子有年奇穎可就也節縮學資遣之訓督而哀旣
稱未亡人姑老病子女連次以長陳氏婦入門二女嬪于

王世節黃大經之家畢力挽拽幾若不可濟則有年登省
錄就乙科領有蕭山教事婦姑相慶偕就養官所每具一
文衣水陸芳鮮之食孺人曰汝祖汝父寧識此耶則汪汪
淚下有年亦淚下以不忘貧賤之教也安分職爲常孺人
再就養東莞子母相對弄大造大閑二孫甚樂旣之有年
請從東所張先生游許之脫凡領要趣尚日加尤爲莞父
老諸生推重及代猶言之當道請留孺人執不可抵家閱
月病革正德丁卯七月九日也十二月葬龜紋山啓尚實
君右藏祔焉生正統乙丑二月二十二日享年六十有三
有年旣得日來言曰有年以族諸孫荷知愛吾叔銘無妄

可恃以傳杖而敢請嗚呼孟陶程呂所以成其子之名者
母之功母之境有孺人之難者乎固不得不深念也孝子
錫類從弼之不幸昭度同也李無翁之烈有年之立與嗣
先嗣宗之立無異由今視昔有餘慨焉噫斯林所爲立也
銘曰甌罄貫殘左泣右號孰是拮据母氏劬勞穎出鋒銷
規循矩蹈孰是淬磨惟母之教卻鮐勵清丸膽勵勤孰是
母子亦偕於聞嗟嗟孺人無古是似我作銘詩亦告人子

明橫山處士林覓隱墓誌銘

龍泉東走而山以地異中擘一枝而西轉而北南面以臨
于壺古荔丹實香風聞數里所謂橫山也吾家處士在焉

處士非隱者也諸生時從吾祖教授授經同門之士連陟
鈞要次之亦不失師儒官處士竟蹶一遇得一廩亦爲有
力奪去久之解學籍侍母覓隱所以志也橫山自斷事公
澮之弟穎通來居居而生處士龐阜秀特其將有鍾先世
主客祕監刪定茶幹四忠義一門所以基林氏者甚厚司
農卿父子榮遇宋元之間朱紫賜第奎畫昭回處士早孤
善奮嗣其後若有當者力足以濟時艱而僅完故業脩上
世祠墓數事行足以移官理而僅收養母之孝立弱弟妹
以成智僅解鄉聚之夢而被物之惠僅周族姻其最大僅
董永豐五官二橋大役而已夫遇險而舟擅其任遇病而

藥奏其功遇旱而桔槔受其巧遇寒而纊挾其執大盜勅敵而刀弩戈戟始收其利其不遇則無因自見焉處士是也既覓隱其友黃方伯汝器爲輸義易冠服處士笑曰無苦繫縛患我強之加則從去則易去治命從處士服以正其終嗚呼賢矣諱琛字宏璧行慶五生永樂甲辰十月年七十八配徐氏宋狀元鐸之後知縣資用之女先二年生後六年以卒媿賢俱壽人稱其難子伯曰景叔曰裕俱早世仲氏祐克嗣書香教三子嘉懋嘉惠嘉慰士業鍾靈衍盛庶其在此正德戊辰合窆卓靈社之雞山因誌于石使納以俟焉銘曰林系晉安載起侍史通議有嚴孫子濟美

主客再世死義四人祕閣宣撫亦時勞臣公篤著存思皇祖考業精行成允收若左公有宅居介是箕穎雲物悠然我以歌咏有美中饋舉案眉齊榮公之母北郭之妻德星夜沈鄉閭有慟來會萬人太丘之墓有石樹笏雞峯之西雙玉在中名永山齊

明儒林曹母孫氏墓誌銘

吳之儒林封主事公曹瑄母王氏以產本歿產中時珎方三歲瑄再歲本未月姻黨吳繼無子求乳本以子父嚙諾焉猶日夜哭慎所以母二哀者曾祖菊庄士遜祖裕軒瑾念之曰無如孫也可孫孫女而曹甥聞順之性習之孫且

成之曹也孫繼王而母果慈二哀迨舉玠而慈無異年二十八喪所天畢心和敬用慰浣其舅姑以紓其喪子於鬱之懷衣食其三子必均序必先玠次理而後及玠或疑其矯曰分固當是且玠理無母子吾子不得與偕玠中殤哭之慟玠且長巨姓錢公噐請贅爲家婿舅姑有難色孫曰本且人後妾子無足獨留且錢曹偕里閨玠雖贅如不出其家若旣受錢產理受全產于曹立易易大人許焉從之主事旣婦李安人孫昕夕盼盼尤在是婦而摩弄其鏤鎔二孫錢氏婦在錢愛若後焉治舅姑喪塋事祭先祠督教孫子臨蒞其婢僕下人皆有恒法貞芳之節比老弗渝有

司欲舉以旌孫不可曰闡立諸孫無一光大門戶直須吾婦人耶主事爲請止旣之鏤果第進士爲翰林庶吉士刑部主事員外郎主事安人皆被有 恩封人服其識弘

治癸丑八月謝去巳巳正月葬東騰從夫封也生永樂癸卯十月壽七十鏤旣郡丞吾莆奉主事命丐銘于俊嗚呼愛惡發諸情而根諸心者也吾子則慈前人子則不慈情以心異耳完財故業前者在吾者不可以獨據而有也夫私生忌忌生妬而易慈仇視而陷者百心焉孝巳之事是矣故曾子不復娶顏氏述繼妻之慘以爲門戶之禍夫無憎則幸矣况望其同仁耶望其贅其子而付前人子全業

身素集卷之二十六
如是耶是尤難者是可以風世矣孫先世仍翁在宋爲迪
功郎族望澤溪而大觀者婿曹子真氏生良王孫良玉女
諱端貞云孫女嫁黃堂曾孫曰某曰某曾孫女某銘曰兒
寒異衣兒飢異食兒操履霜母心匪石古翟耀聞曹乃孫
氏夙違所天之死靡二均氣同父孰後孰先孰忍厥生以
惠于前維烈維賢孫允女士系實掩幽木蘭逸史

明平海衛左所副千戶鄭西莊墓誌銘

西莊諱端字秉直漢中南鄭鄭氏祖茂以武功授寬河衛
副千戶父春襲副千戶調平海之左所從征沙尤寇以歿
君例歸寬河孤且稚也聽平海而家旣襲官追訟廢學從

蔡行人元美授史質經義于士夫久之熟七書辯識四聲
奇字旁通天文地理醫卜星相諸術按本草識藥物性味
投單方疾往往愈日亭午坐予草堂風拔木發屋甚怒君
曰風以申止果止念恒信病亟君燭曰鼻準黃色不死史
崇明駁之君曰公旬日死或以爲戲君曰不戲果旬日死
林元佐過予值君辭去君曰母林主事耶不二年無嗣死
顧文儀繼至君曰公家頓落落且死事後良驗所品藻林
都憲秉仁林僉憲長深黃翰編子敬數十人俱應性警慧
揣發幽秘明炳幾先畫事纂言時出新意惟不屑其類人
文士屬心而同輩妬嫉如仇兵仗例出堂委選能薦君中

之也君挈家來莆寓官局朝督夕課盡色物綜理器精名
立公暇走繒紳商較文事趣詣有加劉東山異之曰鄭某
居三邊取叅副如拾楮既辭繁委一刊落官累魚扈瓜田
陶然野意縱浪于西莊水月之間買地石獅山以葬祖父
父母既未疾跌坐矮屋窮日書蠹簾內無人聲既落莫仰
屋嘆曰交遊相念惟見素一人嗚呼君其知我矣君武而
文仕而亟爲隱寓脩飾于縱俠解弛者流以自立夫例觀
之異盡其用宜有足觀斯特傑所扼腕也壽壬戌歷弘治
辛酉一甲子君固謂然既果然母韓氏配張氏王氏子士
烈娶廖士勳娶魏齊聲衛庠士烈例襲官疏于 朝以假

其弟今士熙襲焉亦君志也娶尹女嫁衛鎮撫胡玘恩生
林有恒千戶段銘戶部主事宋卿其一未行孫男弘基女
二正德戊辰十二月 奉窆祖塋中左之窆先事士烈
狀事行丐銘銘曰居而同奚擇而異術而精奚授奚試有
拂于伸則匪屬人有衍若後奚必若身惟歿以未存考觀
斯文

明瓢湖居士鄭朴軒墓誌銘

朴軒諱世興字孟隆行元一鄭姓陳隋時南湖三先生開
先莆學功爲大宋溪東湘鄉溪西夾漈二先生繼之爲莆
文字著述之祖莊後也溪西由唐殿中丞上騎都尉方遷

公析居迨夾漈裔孫慶始居瓢湖六傳而至元偉生球領
末樂丁酉鄉薦官臨海教諭以卒球生勤娶方氏正統辛
酉生朴軒弘茂簡遠父母竒愛之爲擇佳婦久之得劉氏
實少八歲而夙性老成遇事了了百勞有餘任家帖安之
朴軒年三十三死劉年方二十六子湏四歲女六歲二夫
弟仲資季英俱稚兩世四孤劉獨身門戶嚼牙結頂粗衣
大笠冒風雨櫻觸虎豹出深林以循溪陂指授田作無虛
日征税之輸吏無能隱爲羸孤少長遣就外傳山迴水斷
草屨六十里入城非歲序不容一歸旣授室量能付業仲
資湏補弟子員季英補從事德門爽佑不數歲連天湏之

婦方方二十九歲孫聞喜方三歲聞詩方數月一門伯叔
非寡少婦則孤弱之子女劉能礪以守以再樹諸孤難矣
哉已未歲儉無賴羣集將傾其倉庚以去劉温言飲食之
期旦日授粟夜遣佃夫召近鄉凌晨畢至徐諭之曰遠來
良苦粟視城估損十之二驗直責酬衆袖手去乃約以螺
爲驗一螺鳴則諸鄉螺俱應負鎗弩疾出後有罰是歲竟
無盜或謂有洗夫人之烈智且勇矣嗚呼孰謂亦五十二
卒耶官政弗肅旌典行而家爲落天下之遺節多矣劉是
也予與湏連襟故知劉特詳湏字孔鎮温未得子道其卒
弘治丙辰年二十七正德丁卯聞喜年十四始受成于方

坎株林之原午向又明年始克塋三喪女嫁琰山蕭琚銘
 曰孰謂質脆望零秋先有拔其株松栢弗年孰謂質堅以
 鼓以鑄百鍊之鋼誠臣貞女維橋及梓載生弗辰閱世俱
 促以隕斯身劉如烈夫以勇以健任寄疊稠古今罕見有
 危如縷有冷如灰悠悠昊天特百茲懷節芳而完以勵以
 淑祕發玄堂貞霜皦日

明尚書鄭東園元配淑人黃氏墓誌銘

仙之南溪黃顯姓黃之畊叅幕蠡州水陸道萬里觸突蛟
 龍尾獅象豺虎而交其跡毒風瘴霧健兒不可往淑人穉
 弱女請侍以借慧與年進母某曰異哉州幕曰然無諾凡

婿尚書東園公起屏山軒特秀穎書過目意以會文字瀾
 立星回晶采弼發先侍郎松庵翁曰鄭故聞人兒其復出
 矣先淑人吳曰然無諾凡婦鄭簡斥數婦黃亦睥睨數婿
 久之方通名松庵曰宜卜曰吉州幕曰宜卜曰吉淑人歸
 于我公柔儀有肅無擅遂無獨成驗然後言叅知焉然後
 動移所事州幕者事松庵母事吳昆弟其妯娒有裕朝日
 祭日賓嘉之日視星數起公曰早淑人曰早早有優辦縮
 伸歛散紆劇而勞以理周急應泛無滌漉以居於羸公榮
 名極位出入中外餘四十年淑人偕官所者十僅一承以
 副室九焉封孺人恭人又封淑人名夫人韋布相安若罔

知物采爲異子罔知有嫡庶恩施義東內外多成名公翰

林在告聯屬踈戚節約幼賤千指食無間言隱然義門規

則流聲遠近皆服深輯睦而以相理善淑人公致南京戶

部事歸屏山階有榮祿淑人竝收榆境公戲曰夫人由身

貴要亦由身冷熱以異卽死先老夫果先正德戊辰公卒

淑人前丁卯也上距宣德甲寅歷七十四甲子朝夕奠同

几筵賜藏同穴同舉輦以窆與享錫命之祭齋送之盛填

滿城之西仙人及與爲榮子主一國子生娶嚴主敬進士

觀大理寺政娶傅又娶林季主忠湯出由蔭待選猶治進

士業娶吳女適周禮李銓陳華皆宦家季李出議吾子週

華第進士與禮主一俱卒二女一婦與主一舉子之黃以

節聞竝著周被有旌命孫卽登瀛邑庠生娶陳其一未晬

孫女適張某楊某其一議林某癸酉之冬之仲莖得日主

敬以御史李君鼎之狀請銘嗚呼妃匹風化之始樛木美

逮下之仁以基螽斯麟趾之盛而鵲巢女子蘋藻之夫人

專靜嚴敬歆感之化刑于有賴焉銘以訓世固宜銘曰坤

主於受順承天施不牝于晨職婦是宜懿懿淑人惠和敬

止素絲羔羊翊贊君子柔順安貞寡笑與顰祗將內事無

巧鑿直薰和毓祥式昌厥似少君之妻申國之母

族兄淳翁墓碣

烏山淳翁兄玄堂成銘其碣曰世顯懿叅中司食故大惠
永遺珠之原夜雙玉預兩季光有沃桂樹離離芝縟縟

見素集卷之十六

見素集卷之十七

後學黃佐校正
孫男及祖重梓

墓誌銘

明進中順大夫致左長史事抱獨郭先生墓誌銘
嗚呼汲汲於名者猶汲汲於利也離形去智君子與其晦
而病其矯道有真也而居之有易俊得吾抱獨郭先生焉
先生襟度夷坦軌物柄世未見其不能今也藏至介于休
休之容措施大致抑尤今以少也郭出汾陽之孫嵩之後
徙郭坑徙大蜚又徙郭滄歷叅軍義重承務道卿教授廷

煒三以孝被旌命紹興至正之間宣教季孫廷煒弟也徙吳埭歷存良生長史宴又徙玉井生先生徙東關以讓諸弟卜耕濱居焉諱紹字思緒號思軒抱獨別諸俊昭今潛也長史名長者治旗尾之田以食其私公爲鹽筴虧輸之償力時匱先生承以學子之金并脫其內人簪珥以盡室常懸磬長史與楊宜人未嘗掛一念不足之憂旣入官豐養二親厚其葬諸弟婚娶生齒日繁公私費日以大教諭紀分教纓之庠序服物皆出先生匱則任舉責又任其代其友舉責至爲代償積逋餘五百金先生宦橐一洗又盡棄其旗尾之田心力俱困諸弟未嘗掛一事不足之憂久

之知先生力無足庇已也謝不能弟請分猶東走連州授學徒入其金分給之官之俸又給之百蠶一葉竟之其子不盡支先生歸私語俊曰猶貧俊曰先生無愧官力又未憊奚不藉數歲之俸先生曰吾年已踰六骸骨故鄉有大于是者未再歲先生果不支而野飲社會欵洽諧笑歌聲嗚呼然出金石若忘其貧與其身之旣老也嗚呼其可謂達矣一官竒貨燃箕而闕墻者聞先生風何如先生經學尤精詩文嚴永有思致爲李翰林敬所林郡博元深二門高弟林愈憲長深林都憲秉仁一時齊名二公第甲科先生獨第乙科竟之宦業相頡頏義利嚴立界畛貧而濟曠

隆而舉顧無所於靳在金谿構射亭垣射圃植松栢于學
之主山在滑拓 文廟正之皆由俸酬直以歆感其令教
法莊整旁庠數百里方方然來在太學生徒尤相結太宰
林泉山爲司成尤取禮信晉世子居攝先生日進格言以
忠蓋受知莊先王薦進左長史加四品服色又進中順大
夫父奉政大夫母與配林皆宜人受有誥命故事封冊婚
嫁祿米有常儀先生旣主司柄一意謝絕令行無擇冗要
嬖臣弄舞竟正以法 世子薨 世孫已先逝 世曾孫
冲幼有密謀攝府事者先生曰然則處世曾孫何地約束
浮費諫止供佛翊導四世有鎮定扶正之功焉先生旣不

可留宴餞殊數等以示優異平生公府不入有附爲重以
自濟者先生曰是何與于我吳父歿無子家病疫先生日
視無苦同年黃以禮病疫先生視藥舟中比死倡賻財爲
歛爲歸其棺以葬老僕朝祿樸謹病聾先生爲立妾生子
以副室蔣所養女爲配文賦赤龍壽藏成爲別營附焉嗚
呼先生於一厚要之終身倫紀故無瑕類後與吳都憲世
忠通判弟侃族教諭弟哲甫僉事弟典皆屬陶成方易箚
來俊曰凡以屬汝嗚呼其何能副先生耶正德甲戌以上
去正統庚申閱世者七十有五年噫亦壽矣夫子景雲娶
趙又娶林景行邑庠生娶王景龍醫學訓科娶吳女嫁蘇

善卿孫秉元秉虔秉鈞秉哲女五人吳已附于姑景雲奉先生與林同穴則乙亥也纓狀事行詳俊錄其大如此銘曰兩以竒分均氣範形岐而異之奚有弟兄我通其宜連荆是似孰是刑于暨厥婦子繫先生道訓薄弗諒厥官諒厥族載視厥姻暨友若僕繫先生行斯卓

明進中奉大夫江西按察使耻庵周公墓誌銘

正德甲戌元日之又四日耻庵公病且革命出歛服飾棺授遺範既畢日就申端坐而逝乙亥將葬其孤儉以諸孫宣之狀請銘公諱軫字公載世爲清江上廊周氏周故裕家自香山處士樂施與傳累葉以其有來慶公季父鶴洲

知府諸兄轍主事宣復爲御史郡乘文學者數人族父翠渠布政其子大謨進士鄉聚文物一時周先焉公嗣祖則川不祿父諱越亦不克年祖妣鄭妣王皆樹婦節鄭被有旌典公植立孤煢中自異起鄉薦入國學以學行爲司成特知名遂重六館取會魁第進士爲戶部主事得所想像屹不可攀及被延接直訥鮮文而刑型老格樸根骸性靜範情儉訓俗於古而近之矣庇民經國運若無竒而弊隱以去成化乙巳元日京師星隕有聲公上言誅元惡以快人心減內臣以干朝政正朝廷以正百官罷進書以頤養聖躬親儒臣以論道經邦重科道以糾劾官邪杜僥倖以

振作士氣量進鮮以差撥船隻同時言者多取忤左官公獨以質厚受容猶留滯滿秩始進郎中時西北逆饑延及荆蜀而南濟之無其策公合羣僚白之長疏借藩府奏乞場蕩聽民取一年間有陳辯公執之堅纂修憲宗實錄以文學被選采輯在戶部者以進京師大水南京大風雷詔詢時政闕失時侍郎劉公璋視篆收采羣議公言

天子藏富於民皇亦有庄顧示以小非稱宜與民否亦宜革管庄如例畝限三分責民入租有司解部以進劉公以爲然疏入留中公有山東運使之擢鹺鹵易漏與漑公循源塞孔定爲格歲旱奏蠲其半寧海場鹵縮奏損其引

增永利場足之政成譽起賢能之旌屢上進階與誥贈其祖若父皆大中大夫山東運使祖妣皆淑人配陳封淑人公方以老成負物望而年已踰六兩致其仕不報會致仕加職例行再請始進嘉議大夫江西按察使今上嗣位又進中奉大夫在林下者十有七年自持耿特終其身構族祠增祭田校定手著濫竽存稿爲若干卷典則莊永不隨俗氣格屏山爲周墓所公墓淑人因營壽丘立歸全菴遊息焉晚年體益重閉門養靜斷迹城府姻鄰殆莫窺其面予歸自蜀公特爲予周旋語窮日未休記西曹以言及禍公與林公大猷廖公用中屢獨吾門及疏誅元惡

與予指相和應平居道義之與澹如也非謂不爲翁翁之
態勢異有望者耶公壽八十一二子一女七孫三曾孫碑
詳焉嗚呼化局新淳源愈異吾又幸夫璞之未剖木之未
灾于耻菴及識焉銘曰磅礴兮蜿蜒青松兮誰宅祔祖考
兮玄堂繫形骸兮斯索海與兮沙村滙一水兮誰門與竟
兮偕來幔亭兮子孫月陰兮爲期我庄兮伊邇竟經兮來
遊樹鱗鱗兮石齒齒下上兮四方雨雲兮相從離氛兮釋
垢化雙鶴兮雲之中

明穀城林母封太安人姚氏墓誌銘

鄉抱真守特可歛畏者數人其一汝敦汝敦名典予族也

同趣尚以今五十年歷六官在有奇績家落落猶常其固
君子哉其喪太安人也輟廣西按察僉事來奔前數月過
家爲壽太安人出其半面觀者謂福壽爲宜筮日奉慎齋
公贈京判黃贈安人與太安人封命告祠下太安人冠帔
卽次觀者又謂福壽爲宜旣禮成汝敦戀戀未置太安人
強以行巡右江方起有風望問亦尋至噫其如何乙亥附
慎齋以墓慎齋予銘也茲復以請太安人中沁姚氏中沁
之姚與穀城之林竝名家林世以盛姚坐陳公繼之累謫
戍克忠死於戍太安人父也太安人逮事慎齋秀水分教
之行郡丞公穀與柯宜人已老安人請身留侍請太安人

以從舉典舉冊舉二女慎齋師儒表律太安人柔儀有格
以無難刑于之化引情體義以意爲準量戚踈賤良酬施
皆合無替敬亦無替愛盡婦盡母以食子之成生有封歿
有贈族里有耀楊山草樹隱隱然光氣太安人病若無苦
一日屬家婦閱歛衣遺珥剩服散而盡人以爲早竟奄奄
如夢正德甲戌九月十七日也去宣德乙卯壽八十孫應
祥應祺應文曾孫永通永迪永謨孫女曾孫女七嗚呼方
慎齋世短孤幼滿前身後事如濼容知有典今日耶飲美
者宗其原晉長沙公侃恭勤忠順台人林侍郎鶚廉慎好
禮湛程二母之教不誣抑有感夫成虧之數者矣絡秀屈
節于周生顓李落門以興姚同時坐累其可勝指耶黃敦
信當歿入外弟方郡伯鯉匿其二女以竝適林氏伯爲中
丞元甫公母贈淑人叔爲郡丞思承公配封宜人子茂達
復爲憲副黃亦因以起以予及見太安人三焉命物之成
固無得例已之也銘曰孰通其源孰塞其支脉而出之玄
津澤而海枯陸沉温戶斯落作潤德門蘭階有馥安貞終
慶應地無疆一真斯藏月耿夜長

明亞中大夫廣東左叅政烏門黃君易庵墓誌銘

易庵諱顓字伯望龍坡烏門黃氏上世見予記其祖教諭
公諱廣元生祠父封員外郎公綱墓誌君沉毅內植外美

無足動人起進士為戶部主事機神開朗疑難徐折一言而定同事目為老斷留心政理繙閱部牘參格例以備知國計委輸京儲而權舟臨清也部為之一重戚畹賜第復造君疏止曰臣為 祖宗惜法為 朝廷惜財為某家惜福

孝廟陰納而中其疏周公經為戶部尚書擇賢自助得今侍郎邵公寶與君掌章奏同心在公奏駁無擇柄要部事改觀周用以不安于位君內艱服除復為其部員外郎轉郎中與長異意出為肇慶知府治以廉平恤孤笑抑豪右行平糴為民當怨繩蕉布官市之擾溝黃桐圩橋之水不害稼號黃公溝時廣盜幾徧而肇尤盜區獻計

者欲屠而盡君曰吾玉石分之諭諸落無為盜襲故者羣械之肇人神城隍神令誓無仇方師聽之無枉方當以法繫以待讞三數年間獄死數百人肇得以不煩大師以帖安其雞犬人稱快鎮巡屢最其績以旌袁仕者入衛帥某之賂欲代官養子君持不可會外艱去撫君治盜坐以酷屬所私諭意賂免時賊瑾羅織禍動連身家知舊強君曲處無能為副仕竟聞君業伸辯自度無能携憤憤然如夢至杭而返就獄甘心焉一日忽出君復其職則知御史劉君祥劾仕受賂數十事首及君寃君白而仕逮繫補武昌未數月擢廣東左叅政連推右轄竟以仕吠滕其聲部不

獲已更其任至潮病以弗起正德乙亥二月二十九日也
 年五十三嗚呼士固有弗終者矣方仕媒孽時如墮湯火
 容玩視耶蓋棺事定數百年短屋歲食僅裕可欺耶君治
 肇無繼者治武昌無前者治廣無為竝者斯名士夫私論
 與下屬萬口而同者也仕固足信哉君介特有識崇尚風
 教包孝肅陳白沙皆為立祠陳君茂烈苦行兩許其子以
 女割田周其族皆所謂難者予許君可任大事今已矣失
 君者獨人然哉配鄭氏封宜人有婦行僅生二女子應軫
 與三女出唐應庚出張後君十月不舉丙子膺月甲子祔
 先員外廣化右臂以莖鄭君岳君趣味者狀甚詳予獨悉
 仕事告失君者銘曰嗚呼易庵羣和獨指吾無容喙為子
 之所廣屋一漏厥庇孔多吹毛刮垢亦如子何青蠅加點
 其然其然合抱寸朽吾無子之冤其日其天

少子迂壙誌

正德庚午見素甫年五十九起征藍是歲九月迂生報不
 驚喜甫三子未孫老子亦良慰也歸見之眉目秀異膚不
 色聲音洪亮清遠四歲隨塾兒讀孝經大學一日食菓戲
 索之意靳甫曰不孝迂應聲曰罪莫大於不孝驚異之試
 摘一二字叩之凡所經讀與所聞羣兒讀能一一援引無
 漏客試為常自是慧性日開容止日老成道見者必問誰

家蘭玉甫諸子獨慰意私恠其母蠢且陋無應是兒甫福已踰分亦無應是兒又惟吾林積德之厚甫雖無合于時亦或孚于天故有是報乙亥冬盡痘作夜惟長嘘其母問之曰迂苦姐又曰迂謝姐姐何所歸與奶求阿兄爲子如是種種皆自訣之詞但不明言死耳痘八日不發以天丙子正月五日也嗚呼自謂相償豈知相戲劇耶行猶多未憚征藍之行殺人多累汝耶汝雖短不謂非世吾家起息汝其一占矣不謂徒鍾情也葬汝公媽墓右自撫汝我死耐公媽以墓亦撫汝汝母自能爲地汝可無憂惟朝夕無見汝嬉笑吾前自意汝盡讀吾書無望矣雖自割能已耶噫其何情父見素甫忍泪誌

明通議大夫都察院右副都御史林公豫齋神道

碑

吾家都憲豫齋公之巡撫雲南也以未疾請老者三上難之與驛權就醫于家在牀褥者三年正德戊辰年六十四以終時逆瑾擅柄大臣卒無敢以聞瑾誅始聞賜祭賜葬季子有孚輒監察御史來相葬事葬之紫帽山配陳合焉公成化乙未進士選工科給事中充占城冊封正使以言罷遣同列蕭顯等言事臣姓名屏間一日付吏部與外公以母憂先去獨免旣之代正使者死海上副使

論死責成識者有以知造物之曲爲公地服闋吏部亦爲之所注南京禮科給事中父憂又去服闋弘治時也復禮科給事中陞禮科都給事中論列時出畫可定國本攬朝綱謹好尚節公費黜不職言甚切當而阻汪直王越之謀進士曾番之貢甚力擢山東布政司左叅政畢情民隱而舉其荒政時議稅額石增五升備荒公曰此箕歛遺意利緩而病切在民竟無歛 王妃葬大治塋域公以制自執比付他官民素田遂爲塋有于是怨有歸而公之風力愈重撫巡交薦之擢雲南右布政使轉左陝西火篩孔棘區畫兵饟忘爲勞而調發飛輓民不爲毒撫巡又交薦之擢

都察院右副都御史巡撫四川屬川寇發一麾平之有金幣之 賜番夷殺守路官公獲兼倍而其首僅遺言者劾總兵輕事而謂公緩賊與貴州易撫代者至欲炫已功授意兵備市夷兒斷首抵賊爲功爲言者所彈始明公之不欺 孝宗悟移撫雲南將收而入之而以疾告諱普長以字元甫行更字秉仁林出九牧而同予邵州公系昭度之世秀眉豐頰美髭鬚軀幹脩偉山立而玉潤在班行無過者立心務厚而居以渾晦謀預事先聲與惠流所薦引所白僚友之誣無知者在平原建董仲舒書院在蜀祀趙清獻公與文翁李冰張忠定並祠尹恭簡王端毅稱遠器

韓司徒文力汲引時吾閩諸老皆在南而年頗近迫予任直取忤位遇詰極私以屬公鄭司徒紀曰容色大麗嗚呼謂非相非與公晚益完粹予起征蜀公遺德在人雲貴之聲往往能道者居家儀則來進所歆發弟哲甫教諭子有恒都察院都事有章尚義階有孚與從子有年並為御史有年疏止取佛謫丞有祿郡同知孫大呂大選郡庠生與大道大嚴大旦蘭立筭出孝義載振鄉賢列祀父良弼初封工科給事中妣黃配陳封孺人再贈父並祖宏泰皆通議大夫都察院右副都御史祖妣李與妣與配皆淑人繼配孔封淑人記京師公與黃公文器林公長深黃公汝亨及予道義相許與最後獨予二人年壽相匹公又歿耶銘曰十德九刺邵州奕奕開先忠儒孝弟永錫有煌厥似而美斯觀如嶽之重如玉之寒昔在諫垣諤諤暨暨于宣于旬于是倚毗乃都中臺乃殿西服士有詩書農有絲穀三藩嘉靖 帝念勞臣程脩步跼委運還真膺膺仙原爰有邱章為龍為光日星發祥

明京闈進士雲霄吳子玉墓誌銘

雲霄吳子王之卒子尚幼及是始舉葬事吾莆黃郎中伯固為具事狀陳御史時周為之請銘子王父侍郎公道本齒子兄行而仕頗同時公舉子王頗晚有奇兆名之夢麒

子玉頗幼慧五歲誦書八歲工對偶九歲作思鄉題壁二
詩十歲授以時文而自及古文錄賈誼治安策讀之熟公
異之一任縱觀經史百子擇之師師爲之屈旣之師吾友
戴主事伯綱伯綱曰竒才竒才最後又師吾師少師西涯
翁翁之子徵伯名才名子玉直欲頡頏無畏而友其高弟
子何少卿子元趙編脩爾錫許給事啓衷在太學又友謝
僉事邦用與吾時周高視倫輩決擇名流于千古之上厭
松雪軟媚并其人少之而病遺山膚近太白意若麗靡詩
之學遂歸唐音祖少陵叅以邵庵文主東坡又主老泉其
學凡三變變輒檢其稿曰梨栗閒稿曰棄餘錄曰南還雜
稿焚之殆盡斷自戊申以後爲杜庵弘治集七卷與端一
齋總錄五行前用稿以留子玉好收錄遺書朱墨點校敝
敝窮日力意若直任文事無疑而性尚孝謹治公之喪準
禮而哀至賜葬成遂廬其側調事母林淑人所生母林俱
得懽心廣義莊立義塚建義塾先急匿瑕因力以施厚利
鄉井席其庇盜亦間爲之感竟賫志以逝正德辛未歲也
年僅三十九嗚呼快劍吹毛僅收京闈之一利自况賈誼
殆未然者昔元賓猶舉進士得太子校書子玉無遇殆過
之僅與子安昇之之敏才短札爲類夫香楠文梓皆棟材
也而或天斤斧踣勁風得收夫材者殊幸獨子玉然哉斯

愛才之益悲也伯固之狀可傳予不復論次而特哀其死以洩予悲子王曾祖某祖某皆贈戶部侍郎四子承忠承孝承文承武承忠今為國子生墓在某山某向其墓丙子十月銘曰孰挈而精為日為星孰扶而英為風與霆忽御鯨以孤往繫駮虬而上征槐南昔夢芙蓉故城予懷兮激烈昭遺兮堅貞

明中議大夫贊治尹致廬州知府事孟公墓誌銘
 國家武戡文治蕃育休息垂百年理極亂始於是乎有土水之難孟主事玘首受刃矢貫其臂墮叢屍中瀕數死不死公起正統己未進士歷戶禮主事有風力名戊辰鄧

茂七寇沙尤蹂閩之下上屠戮如割草菅我師失利勢益張公陳攻守至計集三省之兵屯新城屯潮陽屯江山大兵出鉛山躡延平諸路並應筍魚且兔誰則逃之朝叅用其議命將出師己巳六月神機之兵扼順昌俘茂七以獻沙寇平上杭銀冶疲人釁盜歲輸率不當歲費公言當塞竟塞易儲之議章郎中綸鍾御史同爭尤力同杖死綸死復蘇幽之獄公繼有言自分茅焦之滿人數而禍偶無竒隱悟固然耶抑羨藜徒慘無足忠義伏也 英皇帝南內三年群臣無得一朝謁公因旱極言忤 旨知萊州又知廬州治本古意滯宣化流而郡幾無事因得授所學

學子民則有守學者得其師而竟守急流之退歛竒羸子
 姓晟昂嵩鑛鐸鎮邦傑三世鄉進士七人公述作為盛山
 房類稿其什一存者字廷振號靜齋孟出臨淮徙鉛山元
 砲奕百戶者曾祖萬戶者伯祖皆失其名諱再世沒于陣
 祖德浙東金牌元帥歸附我 太祖立戰功既守閩城
 之太平坊家焉父文叔封戶部主事母葉封安人配張亦
 封安人陳其繼公生永樂壬辰正月十有八日卒成化丁
 亥九月二日子暄臬邑庠生俱卒次畢季即嵩公卒後始
 生陳抱節撫教今同知臨江香岩五十年既拱之木勒有
 新銘顧嵩也女適沈縉孫希韶希文希介俱庠生與鍵鈇

而五曾孫淮瀛與邦傑洛潛演而六玄孫 嵩屬鄭少
 谷善夫請銘少谷故予畏臨江子弟南雄壽州舊義宜銘
 惜歲久亡闕猶幸其大者未泯遺直遺愛人口猶熟也善
 完者不責取造物之忌天之定殆有以必之於先者矣蔽
 牛無所用薰天之焰轉瞬灰寒公則異於是銘曰宅之固
 夜之長雲車風馬竟所鄉往以復伸之始玉精發祥 動
 松梓

明中奉大夫浙江布政使司右布政使三渠陳公

墓誌銘

陳公子居諱仁三渠因其有自號也錦墩揖壺山為勝猶

歷孟庸允德贈郎中舜衡甫以鍾發于公一時群從第進士成化戊戌庶吉士邦瑞公始之丁未公繼之己未今憲副邦器公又繼之初公在諸生與陳大叅寒月稱二陳寒月得之敏公矯情爲勤資深而輔之博爲任提學獨賞果發解首寒月名第二爲進士爲戶部主事採輯實錄東廣督軍餉淮南兩以郎中吳宜人憂讀禮廬次引渠鑿池與鄉族同其利示巽定以爲習先再爲主事爲員外郎郎中畢力問學作古文詞自副而國計明習不腐不漏不喑嘿自容隨俗養交取巧化大僚大章奏多出其手闕里災公䟽重脩省闕異端抑奔競禁奢侈侈振士風收人心端教化正風俗禮部災䟽早朝勤政審決章奏訓養東宮進君子退小人節齋醮嚴備邊又䟽雪冤獄紓忠憤罷江南織造復御史彭程官給事中林廷玉補外勿遣又䟽致仕布政使林同蔣雲漢方守知府潘琴宜優異妖僧領占竹寅緣內降宜勿取陝西守臣進古璽又䟽其僞且謂果秦璽亦亡國廢物宜毀勿留皆關切時諱朝紳爲動容 孝廟多所嘉納今 上初司徒韓公文倡伏闕請誅嬖閹鼓怒逆瑾中之力文致公公誤落三官并落韓以去公同知鈞州再知汝州轉南京兵部員外郎掌其武學方是時政如東濕諸司易守爲全身遠害之計公委而任之以無失故

身素集卷之十七
常瑾誅起浙江提學按察副使權量精審公案手自披閱
不付吏積勞成損轉爲其藩叅政疾已作尋起尋復旣之
哭內氏李宜人又復疏乞休致吏部錄賢勞擬進其藩右
布政使致仕 命下公卒已彌月正德甲戌三月十七
日也上去甲戌壽六十一李先二年生亦先一年以卒十
月二十二日也公謹質沉求事郎中吳宜人甚孝於物無
競而分義時嚴不欲涉事累以分所學齊家衆督耕傭節
縮諸費以倍取殷裕皆屬之李成子懋鄉進士嫁其翁憲
卿方員二女抱育大夏大序大節三孫與四孫女李與爲
力予重愛士每臨文歆異與聞論列之大致心與之牙頰

吹鼓忘其跡之疏員曹監還省父方伯公于蜀取道于浙
也具書屬意偕謝良勤公炳炳然世責縈念景仁不起君
實終于位仕處殆有然者懋治瀨溪瑩成以丁丑某月某
日奉二樞以葬以鄭君山齋狀請銘讀之終篇又得三渠
稿天津志閱之盡同聲落落有餘嘅焉銘曰昔在 孝

皇子闢四聰公起版曹允茲素忠竒請匪極卮漏胡繼弗
善爲同時乃邦計有學有仕有騰厥聲睠時來賢抑邦之
楨黨禁于嚴決茲首領弗震弗搖徐觀厥定靈淑百祀繫
公其完遽挈而還瘞玉雙阡碧峰峩峩鳴和並舉言集于
梧庸告孫子

明奉政大夫南京戶部郎中致仕自庵王公墓誌

銘

成化戊戌進士三百五十人甫十人故事責占年狀王公自庵直署曰年四十或諭自隱則笑曰自此至致仕三十年足矣尚忍欺同時循資躡次取美官公一尹五年始召召則以父喪歸服除念母老留終其養服又除年六十矣猶強為親贈命起南京刑部主事三載贈父廷粲公如其官階承德郎母陳安人尋進南京戶部員外郎郎中同時在仕籍者無幾南都僅劉公忠江公瀾韓公重李公善胡公富皆長僚皆賢公無能為地正德戊辰年七十致其政

甫同時壯者物化少者老以謝公倒蔗榆景以保有完名掃軌養重于松深竹野之間間苴屨觀稼莫知為官人亦不欲取村叟異也始從兄夫林司訓授經百遍僅僅成誦誦則無忘而意義了了文字亦典則李翰編敬所許其成果成遂安始上三日囚穴獄出公曰是不相諒過在予民則無罪囚蒲伏自歸治本愛恕徵輸有常期訟曲直積誠開譬如恐或傷尹上宰稱為慈良刑戶之推讞出納淮之權舟如是而謹加至焉平生同色而言擇足而後動心近厚迹近晦取名近庶家素饒卧不重褥食不二羹蔽雞鳴盥洗正中衣端坐可謂敦篤君子矣諱瑄字朝器以字行

更字大器王出瑯琊之後自長慶入閩居南安徙九峯又徙鳧山家焉端平乙未特科第一人公八世祖也諱聲叔曾祖諱伯履祖諱原遠與主事公世有潛德公生正統己未九月乙亥卒正德甲戌十一月己未年七十六配陳贈安人繼陳封安人女六子特晚踰五副室魯始舉鈍林舉銘舉錘猶及見觀覲覲三孫與二孫女遲而收殆然也前旬日過予約相壽丘業往而計至驚愕悲楚生其足恃耶赴弔而卜赤泥之原位申而寅面尤於居近爲宜公窆中陳窆左繼與副以位爲預其墓丁丑某月某日林世正林有章陳桂吳文博林應期林清其婿銘曰外槁內腴矩步繩趨偕而長軀山澤之矚負天絕雲棲棘奚慕長風上征已乃末路何老謂郎躩哉是翁有晚于材匠石是逢退讓菟菟神理所右惟拙之收亦遲之有

明尚義官梅峰曾君墓誌銘

古者宣氣阜物以爲天下利四其業通之于是乎智運猷材効事以其業名若今曾君朴軒又殆出于是之外少孤家落年十六走閩走粵走二京及遼時逐無巧貨舉息輒倍不數歲家族並因以起事育婚嫁有餘給先祠禮有餘舉歲之祀有餘承義孰型冶才子弟爲多因能以授之事聯綴州縣仕籍外之施賴舉火數十家預祕器副人急殆

數百人公修擇委僕僕無倦厭出已以盈官縮與公租之代納殆二百金免息省息貸無酬殆千金其最盛五百金市田兩庠以優士餼龍江貨入甲者評直乙者繼以至翔五百金攬之竟與甲饒之賈王鏢劉騰邂逅質三百金不留券待選魚墨偽券請質竟爲之隱亦竟感其酬然猶無足副泛以間取訾短其不齊情也夫羸熾之所積猗頓鹽鹽丙氏鑄冶烏氏之畜牧君孰多循例散官與販脂酒削領縣而鼎食良異然能散率無逮君紆憲駕表宅里登之郡乘其取重固宜君諱德字崇賢系朱宣靖公之後由晉永安仙遊徙莆而族曾祖德本祖麟父田妣黃配康康子

良寶尚義官娶陳女鄭大廷其婿劉生良中郡庠生蚤卒娶陳良弼亦郡庠生娶林琚治士業聘陳皆宦家其季璜始生屬撫視于陳又屬教成于兄旣二日正德丙子八月七日君卒赴吊悲楚蓋至是定矣墓在常泰里仙螺溪之雞籠山位辛揖乙四窳君中左康自華岩遷而合左右爲劉許壽藏丁丑月日以葬以康郡倅恭之狀請銘傳宋清者謂清望報遠不害爲富究其施無逮君遠甚爲報殆未必然噫可觀世矣銘曰簪斗白縈鍾休漏寂孰當其炎舍焉以息儒名市行廢箸執籌不市之道允也其儔公有助傭士有餘粟孰脫烏鳶承乃桂玉有紆其急而釋其

懸孰是心存命士則然錫有院章紆有藩轍彰義特書日
星綽楔仙螺胡有有澗有岡有燁若光扶桑發祥

見素集卷之十七

見素集卷之十八

後學黃佐校正
孫男及祖重梓

墓誌銘

明資政大夫刑部尚書贈太子少傅謚文肅椒丘
何公神道碑

椒丘公之卒弘治壬戌膺月俊巡視江西時也遺命屬文
墓道之碑春二月公配吳夫人先卒 敬皇帝賜葬祭
公例得賜祭合葬之典俊疏公完德邃學宜贈謚并乞謚
文猶有阻者嗣是吳給諫世忠申論今正德丙子廣昌令

張灤又再論

上曰何喬新學行俱優始終全德贈太

子少傅蔭子孫一人入監既又謚文肅嗚呼論至是定矣
俊得以假靈卒役公者公出宋寶謨閣直學士文定公坦
之裔吏部尚書東園公文淵叔子第進士爲南京禮部主
事家艱復起歷刑部主事員外郎郎中福建副按察使轉
使河南轉湖廣右布政使都察院左副都御史巡撫山西
兼督三關以功轉左入爲刑部左侍郎南京刑部尚書又
入爲刑部尚書御史鄒魯謀躡大理丞公薦魏紳會公外
氏與鄉人奏訐魯遂誣公與聞當道右之已之訊無驗公
乞致仕魯尋謫外尋又以罪論死爲天下快言者累疏起

公不果嗚呼論無待是定矣公字庭秀少穎異年十一二
通鑑道無遺病陳子桎續編書法卒曹彬包拯不書官呂
文渙降元不書叛張世傑溺海不書死節紀義軒附不經
之談書遼金失內夏外夷之辯爲周殿撰中規所竒而沉
晦周謹時然後出言動必儒賢爲準其學以窮理爲先博
物洽聞爲輔正心脩身而措之家國天下爲期自公之隙
目存心寄盡在書有異種輒從假錄藏書至三萬卷忘其
疲與其身之旣老文章援據經史謹厚而簡則所著宋元
臆見周禮集註椒丘集所編選文苑群玉續編百將傳勲
賢琬琰集秘終其身間梓行之天下孤介嚴冷法執是確

身素集卷之十八
不可移積忤袁錦衣伺之無其隙大僚大奏讞大制作皆
出其手在閩奏減銀礦課額蠲半租以無病在民而寘其
稔惡土豪尤者交番薛者于獄在河南黜貪橫有強援守
者一人令者二人趙甲飲陳乙酒肆歸而溺諸河甲之子
訟乙毆死誣服公讞之曰肆櫛比民居毆必有聞去河遠
負亦必有以見驗果拾甲沙泥乙得辨開封並郡竟歲飢
故事賑至秋公令連賑麥實乃已前後安輯南陽賑荆襄
一再賑山西全活不可勝計南陽召回復業十四萬人附
籍六萬餘戶北虜犯邊設伏灰溝橋斬獲甚衆又犯邊殺
邊將畿輔震驚紫荊居庸尤急公往經略練兵立險爲必

搗老營之計小王子聞而遁播州楊友謀宣撫遂謀奪宣
慰誣有反狀公往訊具得其奸奏誅其黨數人革官銷印
而遷友保寧其它疏還留守奪民蘆洲革官校私駕帖禁
京師胡服胡語錄罪囚第徭役行賤糶經猷注措皆翊正
國是贊畫泰平之大端雖未能盡副人意要所謂異同公
者殆非公人也 國朝父子尚書何爲盛識者議之范之
文正忠宣可謂世澤之綿弘治初與王端毅三數公稱大
老可謂人望之重嘗兩得疾 敬皇帝命醫診視遣中
官賜酒米蔬肴可謂眷遇之深雖祿世二品已卽貧而義
利界畛截不可犯鎮守分惠市舶遺財輸之庫武都司感

薦已有文犀之贖楊宜慰聞謝致飲器秘且皆不納平生
氣節友彭惠安文學友丘文莊以爲知己而聲色澹然晚
年喪某某二子僅一弱孫吳夫人強爲立妾舉某舉某邑
庠生孫某監生嗚呼公之隱無愧矣或疑公若涉隘夫繩
矩之間寧有餘地公壽七十六墓去其居百武者再銘曰
天惟純佑光啓 盛明有毓碩人于邦之禎岡鳳誰孽數
麟誰種靈芝無根醴泉獨涌聯休嗣淑有本有文貞霜夏
冽粹玉冬溫上宰崇望總茲銓鏡執虛懸平神力內定秋
卿式似繼總邦刑幽隱照燭噐驩順成國有甫申家乃擊
陟弗震弗搖並是遺直縉典申錫華褒是宜有訶若神舊
德在茲

明中順大夫南京國子祭酒晉江虛齋蔡先生墓

碑

虛齋棄提學按察副使歸晉江也

上起以爲國子祭

酒居之南京命未至卒正德戊辰十二月二十三日也噫
今亡矣先生予道義厚樂石之文先生之意也諱清字介
夫蔡出惠安東林舊望逮處士惠遷晉江傳貢士祥傳潤
傳封稽勲主事翁允元傳先生孱脆骨立而警悟絕人髮
就總盡屈其師裹糧數百里從三山林憲副玳學易得肯
綮以盡成化丁酉發解首辛丑試禮部爲劉翰編戩獨賞

索不終試例不收誦其文士夫爲熟又三年取進士以疾
在告起爲祠祭主事改稽勲主事轉驗封署員外郎王安
人喪旣除復主客署員外郎轉爲南京文選郎中旣乞終
養得自盡主事翁者彌月服又除卽家拜江西提學副使
未幾乞致其仕凝重端未操養力專而進取之念故畧初
友甯永貞孫九峯拜何椒丘願爲弟子旣又友儲殖庵楊
月湖好古獨信貞風淵軌使人躁息妄消嘗曰吾始念一
靜字旣又念一虛字自覺安便不費力又曰學宜養正性
持正行聖賢言語熟復深玩則舊去新來日改而月以化
又曰前輩何嘗不教人舉業義理充拓發由中之蘊彙括

以時文之式自然神采動人奚必搜竒索隱取難字爲工
官閒無見措施而易有精詣學子請益所至履恒滿官所
恒數百人泉之易實出指授一方文物之盛實始焉先生
不謂無其時無其命雖未盡儒者之用有教人數世之澤
祠先生泉人之意也先生天性孝友心盡而力逾勤四世
之墓未慊改遷以爲魄之慰先晉安驛丞鄭者子先生舅
之子翰以去舅竟神主無依先生徧求得之蕭山則鄭已
有子業歸翰翰卒收其骨挈其妻子以還其他總功強近
墓無歸時其衣食家室凡數人詩文自立氣格而論以理
勝所著易蒙引三十八卷四書蒙引四十卷河洛私見一

卷通鑑隨筆一卷虛齋稿若干卷生景泰癸酉六月十有
八日壽五十六配 氏封安人既生存畏有心疾屬某以
佐家政生存素存微存遠存儒存畏鄉進士與存素先卒
存微存遠邑庠生孫 先生寢疾勅諸子治後事門人飲
以粥麾去曰吾欲內潔噫其可謂定矣計至予爲位而哭
先大夫之喪不及遠也其葬以征蜀不及赴也祠雖與在
經畫視晦翁於正獻巨卿於元伯韓富之於狙狽餘愧矣
交之道何如墓在鍾廬山其向銘曰圖象蘊靈綱提鑰啓
孰躡而前粵有廉陞道術爲裂邪論售神儒名墨行孰與
僞真河洛伊縣川途改塞孰引其流以坊其決人豪天授
有發其夢水寒藍出有易其東溫陵一時震迅揚厲與風
俱還儒往之衛

明國清林樸軒張孺人墓誌銘

林自回年館穀艾軒子姓師事之希聲遠調流響至今雖
雌伏林下猶老格踈風轉角回宮和應若與毅翁允鏗然
者翁娶柳東先生女弟承之方翁之子廷諭樸軒娶孺人
爲處士處常孫女又承之張貞質素性守禮而能貧時破
屋穿漏志期必立任織作于方相樸軒以樹藝之事而自
主其蠶牧皆化縮就贏倍于地者顧弗能及事育賓祭公
私無廢舉人事棄及珥鈿而徐輔以節久之家稍裕屋亦

就新謀立妾以時鬻子樸軒意若有待既果舉文俊今編
修也清穎幼慧方易齒伸紙據案踈宕數千言誼傳士夫
爲異孺人請樸軒養之晦專之師擇友以爲麗澤間命饁
田畝使知立家之難編脩甫冠發解首取庶吉士授今秩
報至孺人曰吾患弛于成志以仕而奪也旣就養見僦屋
以居假乘以爲出入朱氏婦荆布無改心爲慰翰林餼膳
大官有常供朱進爲養再進曰其留饌賓吾欲兒官貧其
爲汝恡官所織作如初朱請專爲勞不可曰吾性所安也
編修書史稍倦曰翰林學爲職兒績効在茲門徒候講阻
其出曰書生日可愛也方須有封命以暴疾終垂息拳拳

首身積學之誨正德乙亥七月十一日也壽六十七菹諱
父曰孔堅母 氏女適吳德隆適朱國賓者先卒孫男女
具一男曰宗翰丁丑閏月 舉扶里之新墓山祔姑以葬
以朱氏女從豫屬狀伯固而於予銘墓嗚呼孺人非樸軒
良友編修良師資者歟素門賢淑之擇儀範足多矧共還
舊觀以及見清華之盛種樹者世乃成孺人相攸樸軒固
與所事而回年延致艾軒盛其伊始矣銘曰一以二分流
形散氣坤職于柔有翊內治懿懿孺人含章有貞恪勤將
事庭屏無聲委分食貧延休萃祉孰揭而提于落以起繫
胤璿式于圭于璋於發厥祥星日之光維缺之妻維奎之

母終來有他有孚盈缶魚軒改夕輶蓋啓晨有複假靈于天之申

明旌表孝廉文林郎監察御史梅峰陳先生墓誌銘

正德乙亥陳先生如賓書林墳成明年丙子得目青哭母封太孺人張氏加疾謂山齋曰吉凶未可知吾平生所事見素所友執事又甚謂予曰畢竟如何予曰吾而兄也勉就藥以觀天意私叩其家無一新衣爲之密備甫畢氣絕十二月十有六日也是日天氣慘黑道路流歎吊者皆失聲先生無子予立其族子遠揚爲後與松厓山齋治其喪

守馮君以棺來助越明年正月六日遠揚奉張奉先生暨配贈孺人鄭氏以塋墳土未乾德人先逝噫其如何士民具純行群請之守帥言之巡按王君應鵬以聞禮部覆可蓋坊賜額表宅里進之鄉賢以祀月給米以卹其家始先生以孝廉爲吏部所知奏食學祿養母辭繼以布政使陳君珂薦上特嘉清苦月賜米三石資養又辭

上溫旨諭受及是命三曠典也先生諱茂烈字時周陳爲瑞安大川顯姓曾祖伯洪功陞興化衛總旗傳慶四又傳贈吉安府推官善祥爲先生父父卒先生甫十四歲家貧忍食以飽黃氏祖母讀書時夜分黃憫其羸喻止遂韜

燈默誦究心道學作省克錄自考黃卒易所居資其餘直
買山碧瀨以葬二喪親負土石墳成間日一視父之三五
日一視哭盡哀而還胡憲副榮重古行禮爲子師會試道
遇劫徒附之者幸在抵京如封付之附者請半先生曰某
者去君者存何半太學試第一進士出使東廣盡却贖金
修禮陳白沙因領靜一之誨退而與東所私論難吉安持
大體開至誠通以民彞之懿豪家利寡婦財誣許婚斷從
守志夫制悍妻嫁有娠之妾旣生子歸承其業族人爭之
驗與姊氏爲類爭者媿服時張守本以嚴擊強徐輔以寬
當道尚深峻徐開解爲霽信孚上下官有賢薦而民有去

思郡誌列在名宦考績歸至淮以乏寒具凍幾死所知覆
以敝裘爲救爲監察御史袍服樸素借騎一牝馬身若無
官而自係風紀之重尚書侶者子受賂崔者以道士起皆
根植自固言者屢劾先生再劾侶去而崔猶留先生以母
老乞終其養供母外短床敝席不辦一蚊帳身治畦一蒼
頭給薪出則執小油盞妻子服食粗糲一女適彭惠安孫
輔嫁具涼薄皆人甚不堪而泰然自足日坐斗室究極五
經四書之旨體驗心身隨得隨錄常曰儒有向上工夫詩
文特土苴耳 孝廟上賓與予相對慟哭逆瑾亂政相
對憂憤至羅織重罰以恣毒士夫先生曰某僅有死耳予

起征藍先生杜門養靜悟領深而克養熟隱衷粹行對天地質鬼神鄉國有懼先生知爲愧予嘗評第物品黃憲管寧之右得在孔門可幾閔冉程朱高弟子無讓焉薦者謂廉約如石守道而養獨純孝行如徐仲車而所處尤困殆未足盡者予始識先生諸生韓洪洞問莆人物予曰從吾又問以先生對韓曰以莆再指一書生耶予曰是友自純家居相信尤深每晤言躁慮消熄宿疾爲頓愈先生亦惟予言獨契嗚呼由今其復斯人耶予旣誌其壙又銘其墓其先生私耶張壽八十九先生壽五十八墓五窆封孺人蔣及余壽丘預焉銘曰化樞物治陶靈範精光氣之會公得其清星爛日章後先輝映迨宋宗儒于斯焉盛公有正悟意往神趨靜存動克一真自如搜竊記聞亦敏則有探幽索微玄象誰友世局斯下邪論崩湍始風聿還亦允斯觀

明奉直大夫南京翰林院侍讀學士靜觀吳公墓

碑

文章漢劉揚班馬而下唐二家宋四家其間負豪樹勇與之角要皆一時翹楚國朝文明以止昭回下飾潛溪東里嗣照而聯聲迨天順甲申十八庶吉士之選盛矣莆與者陳常卿愧齋吳學士靜觀愧齋溫純爾雅公瓌竒佚蕩

限韻命題卽席聯句動輒數百言豪詞警語如壯濤激浪
飛雪走雷雲觸山而電迸發同時文正公西涯峯回海立
公直欲相長雄無畏風稜孤峻不屑取雷俗當其意略分
忘年間有未愜意氣衰冷言語爲之無味以故躡收巧化
率無公銜名官幾三十年僅一與實錄金綺之錫由檢討
而修撰諭德皆九載後遷又三年朝論滯淹以久始侍讀
學士署而南君子以爲得立官之介公雖文字職業而決
擇內定宿所知與無間賤貧每長篇短章伸紙立副自他
時有干購必覈事是非人望實可否不爲執隆赫儀幣豐
腆易素君子以爲植已之嚴其修實錄也要人子寇者賂

優其父半詞公曰苟爲是負所學負 朝廷他日何以見
董狐地下君子以爲得持論之公兩領會試同考所得多
名士會元儲公殖庵其尤者也諱衍字希賢以字行更字
汝賢吳自沈坡徙鰲峯又徙東井父諱熊有鄉行封檢討
再封南京侍讀學士母黃有內懿與配朱俱封至宜人公
事親孝謹而友其弟希亨以厚嘗一乞歸省歲時致俸金
文綺食品之竒猶惴惴然屬心由于弟以爲親恡竟之肉
未寒而家遽落平生無他嗜好書卷不釋手有惠本必閱
之盡然猶酒未忘情予鄉國特愛思有以忠之公爲予止
三月竟以知舊復勸勸復飲弘治戊申予赴滇南公載餞

身素身卷之十一
我于龍灣舟次泪油油若弗勝嗚呼謂竟是訣耶已酉五
月二十八日也壽僅五十三計聞 孝宗念儒學之臣
優以祭既之二親亦長逝谷清蔡山之葬子彰符彰武彰
憲強爲力今惟彰憲乎在二孫正誼正宗二曾孫某某復
始錫類將有泣中書之石而著紹訓之書者矣嗚呼公文
章爲莆立幟名家落落擅響者誰與假之年又可知也昔
人論退之元賓之至謂不在壽夭之間夫元賓之才其誰
則限之使公而在文正將不怙怙然文宗之席惜公亦爲
莆山川靈氣惜也位遇詣極其將誰計哉序而文之碑銘
曰莆始自唐文昌發祥日杲星寒有曄其光豹躍龍翔鸞
鵠停峙公起詞垣嫡宗是祀蘭臺芸閣疲神役精奏彼金
石群喧寂鳴公時舊學亦古良史侍直 帝旁妬生于
美物不尚全才名忌盛並收兼容 天子之聖維世孔
縮維名孔修維生以弗酬維後之收

平南碑

國家汛掃胡元還帝王之中國羶毳被冠裳櫓巢襲我
廬宇航浮索引之國羸負以歸職貢維南徭牙互湖江廣
之間姓名漏在民版乘間竊發三邊罹其害今 天子
方嚴內修舉外攘北平劉趙西平藍曹南平胡徐及王黎
獠之在東者平無虛歲徭以爲畧已也寇榔桂仁化上猶

數十縣俱震于是有平南之師授都御史其柄韶陳公金主之贛王公守仁主之衡則鳳山秦公金陳元老壯猷二公則文武爲憲者也時方有偏鎮香爐山之苗之征公擇能授計而自解柳桂之急偕鎮守杜公甫巡按王君度謀同以其兵屬奉將春統之三司魏贊之璋濟由柳進庭爵質由桂陽進宗仁英臨武進翰璧進自桂東責餽餉鳳璘而覈其功實於度公馭中責戰丁丑十一月至于閏月連破其寨峒若柵九十而畸擒其僞大王龔福全斬其僞總兵劉福李斌若首若從與屬而俘者凡三千而餘焚賊屋千區牛馬器械無數二公韶贛之功稱是征苗之師亦以

成告捷聞

上璽書褒獎加公俸錄一子爲世百戶邊

人悅喜願立石紀功德古者治夷宜畧斯近土之夷出入爲梗易之師田有禽利執者也而決勝靡遺是謂丈人之吉采芑美方叔以見周宣中興之功平南碑不可已繫之詩曰粵在禹服甸侯要荒綏處文武華夷之防維時山猺入我障塞鷗義矯虔作我蝨賊王者無外合是以容來柔來馴息其諄凶維昔有苗言格干羽徐方其來亦戒師旅維徭罔念卒玩以狂擇肉輔縣翼虎斯張帝念邊人罹茲慘毒雨燐熒熒寃鬼夜哭咨爾臺臣其總朕師錫之弓矢玉書銀符公時征苗擇可以蒞選將練兵物馬功器有赫

申令宿戒其鄰如雷如霆三方以征何神天至寇是大窘
魂飛計窮縮如蛭蝻外示猶闔厥聲弗雄戮其魁首活其
眊童會應機投策無遺筭匪臣之能蔡功之斷言釋其俘
以訓以敕胡不藝樹偕我衣食胡不貿販偕我經營胡不
絃誦偕我太平維時南荆文物上國胡襲獷頑以赤其族
維 帝之威亦天之怒遏其亂源章我王度南荒旣平
八方肅清歷服無疆 天皇 聖明

明襄府左長史食正四品俸進階亞中大夫慎齋

吳公墓誌銘

五侯天龍吳大姓族焉青緋肩望入 國朝鄉進士者八

人進士三人進士慎齋始也諱宏密字慎夫少從提學吳
憲副授經悟領殊到重以文體獨典異爲先生獨賞曰子
之矢殆無虛發病多自阻僅之閩省一試禮部一試試輒
收例得顯選獨乞授教授以便養二親在處庠者五月超
擢右長史署之岷藩又署襄藩質木畏謹廉不近名強直
而不近矯以竟取知重襄憲王疾亟諒公惴欸受遺二長
史輔政意尤于公平屬公事定王如事憲王尤取知重薦
左長史食正四品俸定王薨又事簡王如事定王在輔導
者三世舊學宿望孚于上以信乎其下左右涉有竒請恐
恐然公 知府之政內外乎肅道用行物久時化亦有以

預燭先事之幾者矣解政重不得請托掃松以避居于家
猶時悒悒色憂人莫知爲隱簡王薨世王愆違爲其下所
發一府皆曰吳公在無此其速公還公還開道以檢身維
家臨政大防而遠其佞幸獯狡可厭惡者府用無事時巡
撫王公第府僚殿最獨公乎與韓公簿責府獄獨無連及
于公弘治丙辰公年六十二請老益堅王惜其去宴賚優
常令諸臣不爲格餞江上傳致繕勤官校護抵家反命爲
慰觀者歆嘆間有淚下乙丑

詔進亞中大夫優游林

壑與野老相周旋者餘二十年王屢書存問有金幣之賜
同時進士榆景之收槩無及愧齋靜觀述作之盛幾頡頏

慎齋集在焉曾祖師傳祖德懋父體舒贈奉政大夫修正
庶尹右長史母鼓山梁氏贈宜人配亦梁氏封宜人節謹
善相公盡于外宜人盡乎內以致隆二親之養之葬之祀
田之備先業旣盡歸伯氏猶損祿賜以時益其羸舉嫂氏
之墓量其餘爲族里之給先世所助海橋石折厚金爲易
人於是義公亦於宜人乎重生宣德乙卯歷正德丙子壽
八十二梁生後四年前卒弘治戊申壽五十一子三天麟
衛庠生娶黃天驥娶梁其季天駿上殤天麟亦前天子族
子尚義嘉績其婿孫梅楫楷標彬梯孫女二可塘之山位
癸者墓公壬申所營葬宜人祔以天駿者也戊寅膺月

身素集卷之十八
日天驥業公乎合祔以劉氏副室因嘉績以予族諸兄知
府舜卿之狀請銘公之詳具姻里予長湖憲故熟也昔董
仲舒兩相驕王所居而治病免以壽自終殆亦有同者予
未任劉向氏評其任是銘銘曰有塞其涂容軌非故外視
若徐隱乃若鶩居謙處下戢采攸宜孰是其盈顧益以卑
師席未煖藩相特遷弼亮正色曰時汝賢在鈞惟甄在鎔
惟治視候運化別浮於雅羸豕躑躅曰時與幾色斯以舉
二疏之微旣多受社亦介眉壽廣川斯前亦允斯後

明封君桃村鍾鶴侶墓誌銘

正德丁丑季冬四日鍾封君鶴侶卒鶴侶故處士而曰封

君子善經起進士節推恩及御史恩尋及輟以俟故曰封
君也鶴侶少治舉子業弗收棄之而委業于弟光澤令華
也于子御史君也聯穎茂而蒙養之間多有所成喜爲詩
與騷人韻士商摘其隻字半句風格適勁頗不類山林言
旁涉虛中鬼谷之術推人貴壽窮天語良驗寄懷象外自
放之丘壑之間曰吾無辱爲榮無繫爲樂松雲吾巢烟水
吾性鶴其吾侶矣號鶴侶人曰鶴侶也就養于莆趺坐斗
室倦則時壺山而瞻對之一日賦數詩爲贊以見我雲庄
濶巾長袖翩然野鶴遂與據榕根燒茅柴具脫粟酌以鶴
侶之篇序小像贊之因信荒寂有人而御史之賢有嚴君

焉諱恕字勉仁自金陵入廣五易地而順德桃村族焉克
文生德廣德廣生康康生曉爲藥溝丞鶴侶父也母氏
鶴侶有至性刑于梁以正位于內健施順承家庭衍衍以
無愆于度姻族時式鄉之閔取平焉華善經旣仕籍數數
然寓書以無速官謗華宦久屬留祿餘隨杖屨相其祠事
其可謂知本矣生天順乙亥三月二十九日壽六十三子
卽御史娶黎其仲善綸娶吳善綸先卒邵景星張文明其
婿孫曰繼俊繼傑繼賢繼儒已卯月業啓竈某山以葬
位曰某日曰某十之曰吉御史函狀具書哭拜授使者來
甫請銘僉臬王君時行書爲速昔有召醫于交交追德其
父速醫以往御史德故在甫銘其父甫之欲也庸僉臬然
耶顧予亦甫民辱遊父子間尤未已者銘曰洪源易位弱
水在東有委其逢弗諱以窮自我非我任達胡病古丘纍
纍孰愚與聖升落淹速容執其幾福謙與順神理斯宜並
鶩聯翔前征後起揚芬宣靈門祚之始玄岡韞璧長夜冥
冥有湏褒潛有紀斯銘

聖